



Kamis, 05 Januari 2023
Ogen: Heber 13:8



Jesus La Mobah



Meter nta melawen perubahen pasti jadi. Adi mulih kita ku kuta, nta ku sada ingan si kin pernah kita ku je, tentu lit siidah si mbaru si "berubah" i bas ingan e, sabap la lit si tahan rasa lalap bas doni enda seakatan perubahen. Manusia mobah sendalanan ras umur, pertemanen ras perdalanan geluh siidalanina gedang-gedang tahun kegeluhenna. Labo perlu aru ateta ras labo perlu ngelawan perubahen e jine. Si perlu sitengeti terlebih i bas pemenan tahun bagenda e me kap ku ja nge arah perubahenta, reh ulina nta reh la ulina, reh sikapna nta reh genjengna, reh rembakna ras Tuhan nta reh dauhna kita arah soraNa.

Kitab Heber nuriken kerna kekelengen ras tanggung jababta selaku kalak Kristen man temanta manusia ras i bas mpertahanken injil kebenaran. Lit piga-piga kalak si mobah i bas kiniteken si erpalasken perkuah ate Dibata nari kempak si erkawiten ras usaha manusia ndarami perkuah ateNa. Guru-guru perguak rilih i bas ngajarken pengajaren kerna ndalanken undang-undang Tuhan, pantang-pantangan perpan, si mpelebei pujin man manusia asangkan pujin man perkuah ate Dibata. *Dibata tetap seri nai-nai nari, genduari seh pagin*, bage me nina rasul man perpulungen, guna ningetken kerna perkuah ate Dibata e, la pernah mobah, amin kai gia si terjadi. Jesus la mobah, em jadi sauh si megegeh nandangi kinitekenta. Ertina kerina perbahanenta erpalasken perkuah ate Tuhan i bas geluhta. Si inget tetap perkuah ateNa, maka i bas kerina dampar geluh kita arus tetap "teriket" ras Kristus e jine. Kristus la mobah, tujunNa bas geluhta la mobah, sura-suraNa kerna kita la mobah, janji setiaNa la mobah. Maka iarpaken kita pe ola mobah i bas rencangan Tuhan nandangi geluhta. Reh setiana kita reh tangkasna sitandai IA. Paguhlah tetap kinitekenta sebab si patuh ras setia nge ngaloken upahna ibas Dibata nari.